

# Fenomena air pasang luar biasa jadi tarikan

**BAGAN NAKHODA OMAR** - Penduduk Kampung Nelayan dan peniaga kedai makan berhampiran Pantai Bagan Nakhoda Omar menyifatkan kejadian fenomena air pasang di pantai itu luar biasa sejak dua tahun lalu.


Mereka mendakwa, jika dahulu kejadian air pasang besar itu berlaku dua atau tiga tahun sekali, namun sejak akhir-akhir ini, fenomena itu berlaku dalam tempoh sebulan.

Penduduk, Bukhari Yusof, 60, berkata, walaupun kediamannya itu sering dilanda air pasang besar, namun timbul tanda tanya apabila kejadian itu semakin kerap berlaku.

“Kalau dulu nak tengok air pasang besar pun susah, tapi sekarang boleh kata hampir sebulan pasti kejadian ni berlaku tak kira musim,” katanya kepada *Sinar Harian*.

Bukhari berkata, kejadian air pasang itu membanjiri kawasan rendah kediaman penduduk berhampiran dan mengambil masa beberapa jam untuk surut semula.

“Pastinya kami yang tinggal di sini bina rumah tinggi supaya tak ditenggelami air masin.



Pengunjung di Pantai Bagan Nakoda Omar menyaksikan fenomena air pasang yang berlaku di pantai itu.

“Bila air kembali surut, banyak longgokan sampah-sarap, termasuk ranting kayu berselerak bawah rumah,” ujarnya.

Sementara itu, Zamzarina Iaini, 33, berkata, kejadian fenomena itu menarik minat pengunjung untuk menyaksikan proses per-

ubahan alam itu di kawasan pantai berhampiran.

“Biasanya mereka akan letak kereta sejauh kira-kira 500 meter untuk ke pantai berhampiran melihat fenomena ini.

“Pengunjung begitu teruja dan buktinya mereka sanggup tunggu

berjam-jam lamanya hingga air itu menutupi permukaan tanah di kawasan ini,” katanya.

Katanya, kejadian air pasang besar terburuk pernah berlaku kira-kira sembilan tahun lalu hingga anak-anak kecil menjadikan kawasan itu pesta bermain air.

“Anak saya pun pernah rasa guna papan tongkah kerang luncur air di depan rumah. Memang kalau imbas saat itu, seronok dibuatnya.”

- Zamzarina

“Anak saya pun pernah rasa guna papan tongkah kerang luncur air di depan rumah. Memang kalau imbas saat itu, seronok dibuatnya,” katanya.

Peniaga kedai makan, Norhaniza Mohd Saat, 26, berkata, sejak dari kecil dia sememangnya sering menyaksikan fenomena air pasang berlaku di hadapan kedainya yang bertentangan dengan perairan Selat Melaka itu.

Bagaimanapun, katanya, kejadian alam yang berlaku itu sedikit berbeza sejak akhir-akhir ini, apabila ia lebih kerap berlaku berbanding tahun sebelumnya.

“Walaupun air pasang ni keruh, ia tetap jadi tarikan pengunjung terutama bagi mereka yang tak pernah saksikan kejadian ni,” katanya.